



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

18. Kalenderwoche – ab 3. Mai 2009

Sisdehm is Sisdehm

Nascha, mir dud das mid dähm Wahlkambf ooch offn Geisd gehn, abor off dor annorn Seide muss mor nadiehrlich einsähn, dass Wahl sein muss, weil mir ja widdor eene Regierung brauchn. Wenn die alde Regierung ferdsch is, muss ja eene neue ran! Das is so.

Wenn mir ma baar Jahre ohne Regierung bleim dädn... nee, das däde nisch gehn! Alleene was da an Schdeuorgeld offloofn däde! Berge von Schdeuorgeld, die keenor vorwörschn dud! Mir dädn am Ende im eischnen Schdeuorgeld erschdiggn! Nee, mir brauchn eene Regierung, die das Geld immor scheen vordun dud. Un unsre Enkels solln ja ooch noch was ehre - un wenns Schuldn sinn!

Also, so gesähn, sinn de Wahn schon wischdisch. Es muss widdor eene Regierung hähr!

Was nu fiehr eene Sorde von Regierung, da dun de Meinung allordings schdarg ausenandor gehn. Soll de Regierung mähr das Geld fiehr de Reischn vordeeln odor mähr fiehr die, die noch nisch so viel Geld gehordet hamm? Odor mähr fiehr de Sischorheid odor mähr fiehr de Bildung? Mähr fiehr dähn Umweldschudz odor mähr fiehr de Audobahn? Un dann nadiehrlich die Frache - grade jedzde im Middlbungd: Missn unbedingt de Bankn geredded wern? Also, die Bankn, die jahrelang Milljardn vordierend hamm un nu jedzde bledzlich Milljardn Vorlusde hamm. Missn die geredded wern odor solln die erschedema... also die, die jahrelang vordierend hamm, alleene sähn, wiese komm? So wie das jedor Fleeschor odor jedor Seefehärschdellor machn muss. Wenn de Griese kommd, mussde an de Rigglachn ran. Da mussde das Geschbarde nemm un sähn, wie de ibor de Runde kommsd. Odor du dusd bleide gehn. Das juggd dann außor disch selbor niemand im Lande.

Nu sachn alle... also, die, die jedzde an dor Däde sinn... de Regierung... abor sogahr ooch de Linkn!
...sachn die, dass de Bankn nisch bleide gehn derfn, weil sonsd das gesamde Sisdehm grachn gehn
dud. Ja, de Bankor hamm das Sisdehm sozusachn ausgehöhlord wie de Bisamraddn. Das is e Ei!
Schdelln Sie sich bloß ma vor, sowas hädde zu friehore Zeidn uns eenor erzähln wolln... im
Bardeilährjahr zum Beischbiel... dass dor Gabidalismus de eischen Dodnträbor, de Bisamraddn-
Bankor, am Busn nähren dud! Nee, mir häddn das nisch gegloobd!

Un nu jedzde... es dud widdor niemand rischdisch gloom! Alle dun um dähm heeßn Brei
ringsrumredn. Keenor will dähm Raddn werglisch ernsdhafd ans Ledor! Heeschdens dähm Schwanz
wollnse dähnen e bißl kirzn!

Un ooch die neue Regierung wird da nischd annersch machn wolln. Ja, bei alle Unnorschiede, die
eene Regierung von dor annorn unnorscheidn kenndn, am Sisdehm will keene was ändorn! Un so
gesähm isses nu ooch schon widdor vellisch egahl, welsche Regierung mir nu grischn wern. Eene
mid dor Angela odor eene mid dor Wesdorwelle? Eene midm dähm Schdeinbeißor odor midm
Driddihn? Egahl! Sogahr wenn dor Osgahr Lafongdähm midmachn däde... nee, mir brauchn keene
Angsd hamm, das Sisdehm dud keenor kabuddmachn! Goddseidank!

Eduard Sachsenmeyer